

Sègra de Sènt'Ugèna

L'Union di Ladins slèria fora l'envit a tor pèrt a la festa grana per la patrona de Fascia

Tradizion e devozion - Ai 16 de firé l'é Sènt'Ugèna, patrona de Fascia e donca festa grana per duta la comunanza cristièna de la val. Nesc veies, descheche conta ence Annelise tel toch chiò apede, ge à semper tegnù a jir a messa sun Ciaslir de Vich e a preèr la Sènta martire, acioche la i vèrde via e la i compagne semper.

L'Union di Ladins de Fascia l'à a cher la tradizions e ence chest an la slèria fora l'envit a tor pèrt a la messa e a la sègra, endrezèda da La Pro Loco de Vich, adum al Comun general de Fascia, la Scola Ladina e l'Istitut Cultural.

L'é n moment identitèr emportant per noscia comunanza e chest an l vegnarà

solenisà amò de più da la prezenza del Piscop de Trent Monsegnor Lauro Tisi che l dirà messa grana ensema al piovan don Andrea Malfatti e i etres preves de Fascia.

Se se troa da les 9.30 aló da l'Oratorie de Vich da olache ponta via la procescion, da les 10.00 l'é messa grana sa Sènt'Ugèna.

Sobito dò messa l'é n picol concert de la Musega da Vich con grostoi e zeche da beiver per duc.

Te sala grana de la ex Ciasa de



La bela geija de Sènt'Ugèna sun Ciaslir.

Comun de Vich la Pro Loco à endrezà la prejentazion del codejel con duc i lurieres artistics di concorse di egn passé e vegnarà metù fora ence i lurieres di studenc de la scoles de chest an. Chiò sarà per duc ence n picol buffet.

La mostra coi desseignes restarà fora enschin ai 28 de firé, se pel la veder da doman ti oraries de ofize de Comun e ve envion a jir a litèr l lurier che ve sà più bel. *(mci)*